



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7

Centre-i Delhi budget nokdangba atema Kejriwal-i sorkar aitsü

Xi Jinping-i Russia Tir Putin dang China semdangtsü ashi



VOL. XX NO. 159 (ADOK 159) DIMAPUR RASEMNÜ (WEDNESDAY) METSÜREMI (MARCH) 22, 2023 ₹ 5.00

Nagaland sorkari ULB election agitsü Terenlok atema Naga yimten latettsüla: La Ganesan

Kohima, March 21, 2023 (TYO): Nagaland nung May 16, 2023 nü Urban Local Bodies (ULBs) indang elections agitsüsa ta state sorkar Mongulbarnü metetdaksüogo.

Mongulbarnü Assembly session aigba sülen Chief Minister Neiphiu Rio aser Deputy Chief Minister tem- T R Zeliang o Yanthungo Patton nungeri anir MLA ajak külem senden ka amenba sülen iba osang metetdaksü.

"Supreme Court-i tuyuba ama 33% women reservation lia

sorkari ULB elections agitsü renemogo" ta Urban Development Department and Municipal Affairs Advisor Zhaleo Rio-i ashi.

"Chief Minister Neiphiu Rio-ia assembly nung iba osang metetdaksütsü. Onoki sangdong agütsüba magientsü" ta Zhaleo-i ashi.

Kin hohotem aser municipal & town telok balalai ali aser ki nung tax agiba arlla yanglshitsü akhanger saka iba ya Urban Development Department-i jangjashitsüogo, ta paisa ashi.

NMA 2001 nung ali aser ki nung tax 'delete' masü tashi shilem magitsü

Kohima, March 21, 2023 (TYO): Dimapur, Kohima aser Mokokchung nung municipal councils 3 aser town councils 36 nungi 23 tashi nungi ULBs teshimtet nübotem Mongulbarnü Kohima nung adenshia senden ka amen.

"Nagaland Municipal Act, 2001 nung ali aser ki nung tax indang enoka alibaji 'omit' masü saka 'delete' asütsü bangjemtep" ta Dimapur Urban Council Chairman Federation (DUCCF) president Zasivikho Zakiesato-i senden amenba sülen ashi.

"Municipal aser town council temi tetsür nem shilem lemezükja ULBs elections agiba nung mashishiteper saka state sorkari nübortemi adokba ola mangara onoki elections nung shilem magitsü aser nisung shinga nomination mesüdaktsütsü bangzüngtepogo" ta Zakiesato-isa ashi.

Tanü Kohima nung Hotel 2K nung senden amendang municipal aser town council külemi NMA 2001 indang lemsatepba sülen Naga nunger ajak tenüng nung aser Indian Constitution nung Arlla 371 A nung ajemdaker longjemtsü mulungtep.

Parnokisa Nagaland sorkar dang elections magidang tamasa Nagaland Municipal Act, 2001 nung keta aliba onük ajunga meyipa repringshitsü ayongzük. Parnokisa Municipals mesüra

Towns nung ali aser ki nung tax kecha magidaksütsü bangjemtep.

Sorkari Nagaland Municipal Act, 2001 meyipa mereprangshira Municipal Union aser Town Councils-i election nung shilem magitsü aser nisung shinga nomination mesüdaktsütsü senden nungsa bangjemtep.

Nagaland nung 2004 küm tatemsa agiba sülen ULB elections magii dang arur. 2017 küm sorkari ULBs election indang vote asütsü anogo ka jakdang mepetmesü adoka nisung 2 taküm samaba aser aika yiruba sülen sorkari election thina liasü.

Iba lendong nung Kohima Municipal Council office aser sorkar office tem rongdoktsü.

Iba tatalokba ajanga Chief Minister TR Zeliang-i aniba NPF sorkar atsüngdoka liasü.

State Election Commission-i March 9, 2023 nü ULB election agitsüba osang metetdakja liasü.

April 3 nungi April 10, 2023 tashi nominations maparen tenzüksü, April 12 aser 13 anogotem nomination papers repringtsü aser April 24 tashi nung tenüng meyipa agitsü ta State Election Commission-i metetdaksü.

Iba sülen May 16, 2023 nü election agitsü aser May 19, 2023 nü votes azüngtsü ta parnokisa ashi.

Naga wako aser temzüng ya magientettsü: NSCN-IM

Dimapur, March 21, 2023 (TYO): Naga wako aser temzüng ya kodanga agientsü makok aser Naga nunger pei sasa yimten yimsütsüba aser putiotsü nung meindoktetba shilem lir ta NSCN-IM-i India sorkar dang shiogo.

May 31, 2022 emergency national assembly nung NSCN-i kechi südir süaka Naga putiotsü aser Naga National principle nungi mainshitsü ta Naga nunger tsüngdang lemtetogo ta NSCN-IM, president Q Tuccu-i ashi.

Mongulbarnü Camp Hebron nung 44 buba Republic Day

benjung amongdang Q Tuccu-i iba osang metetdaksü.

Anogotem süia arudang India sorkari Framework Agreement nung nangzükba ama meinyaker. Parnoki süoki ia mebilemer saka tiyazü dang jembir. Iba ajanga India sorkari miima Naga nunger madak tashiyim amshitsü tasa atongba sayur, ta pai ashi.

"Olemtep nung tamakok angu nungbo onok liyonga aotsü atema sentong ka renema lir. Asenok liyonga aotsüla aser iba tatembang tongpang ajanga asen tarutsü tia lemtettsü" ta Tuccu-isa metetdaksü.



NLA Secretariat Kohima kima Nagaland Governor La Ganesan den 14 buba Nagaland Legislative Assembly nung MLA tem külemi agiba noksa ka angur. (Kohima, March 21)

Kohima, March 21, 2023 (TYO): Naga yimten melatetba ajanga state nung terenlok aser azükaru nung tetsükdaksü ajurur anungji tekaratiba nung iba ya angatettsüla ta Nagaland Governor La Ganesan-i ashi.

"Yimten tebilemstü ajanga asenok mainer aser tayongzükba jenti ajurur. Nagaland state renloktsüba aser azükarutsü atema inyakba mapa nung iba ajanga tetsükdaksü agütsür" ta Governor Ganesan-i Nagaland Assembly nung mezüngbuba onük jembidang ashi.

"Tekaratiba nung Naga yimten tebilemstü ya angatettsüla. State sorkari yimjung maparen akangshitsü atema maneni teyariteper ka ama inyaksü" ta pai ashi.

"Onoki maneni infrastructure tajungba akümtsü aser district administration, police o security agencies-i mapa tajungtiba inyaksü atema merangtsü" ta Ganesan-isa ashi.

Eastern Nagaland Peoples' Organization (ENPO)-i eastern district tem atema state balaka meshiba atema olen ka jembidang "iba onük atema India sorkari mapa inyakdar aer Ministry of Home Affairs ajanga tentettsüba telok kati ENPO den asüngdangtepa mapa inyaka arudar" ta Governor-i ashi.

"Eastern Nagaland nung alirtem khurettem koktetsü atema ozü sorkari iba maparen nung yariteptsü aser terenlok agi anünga aliba asoshi inyaksü" ta paisa ashi.

"Supreme Court tetuyuba kübok state sorkari mapang

talangka magiteti aruba Urban Local Bodies elections agitsü atema mapa tenzüko. Constitution nung lateta aliba ama ULBs tentettsü aser iba ya yimti aser jilatem renloktsüba aser tejakleni aotsü atema kanga tongtipang lir" ta Governor Ganesan-isa ashi.

Nisung ajaki nübortem aser state ajungtsü atema tangatetba nung ULBs elections nung shilem agitsü ayongzük, ta Ganesan-isa ashi.

"Nagaland nung tawa general elections agiogo aser polling anogo nung nisung aikati shilem agiogo. Nagaland nung aliba senotemi democracy tera tali ayangtsü aser tashi aitsü atema shilemagiba asoshi pelar" ta paisa shisem

"NLA indang mezüngbuba session agiba atema tepela salem abener aser kasa mapang sorkar ketdangsubaren ajungai tetsüba melii aser tejak mereprangi democracy atema inyakba asoshi tenüngsang agütsür" ta Ganesan-isa ashi.

Taküm election nung NDPP-BJP teloktepi maneni takok tulu anguba ajanga Nagaland nung sorkari tesüba küm 5 tashi mapa inyaka aruba nung nübortemi tamang akar ta asüba sayuogo, ta paisa metetdaksü.

Nagaland nung nütsüng yongsük 70% shi kati agriculture & allied activities dak dang amendaka lir anungji sorkari maneni iba wadang asoshi inyaksü aser teyari agütsütsü. Linük indang organic basket nung Nagaland-i shilem tulu agitsü atema inyaksü, ta

paisa ashi.

"Mission Organic Value Chain Development for North Eastern Region kübok Nagaland nung ali 23,000 hectares tashi organic certification agütsüogo aser Farmer Producer's Organization 38 tentetogo. Department of Agriculture-i maneni high-value crops, oil seeds & pulses atema temulung agüja inyaksü" ta Nagaland Governor-i ashi.

Department of Horticulture-i Mission for Integrated Development of Horticulture for 2023-24 kübok "Model Horticulture Village" tenzüksü tebilemba lir. District 16 shia nungi yimtsüng kaka "Model Village" ta ajitettsü aser fruit mesüra spice crop ka atema temulung agüja yaritsü, ta paisa ashi.

Department of PHE-i Jal Jeevan Mission (JJM) kübok 2023-24 tsüngdang kilen 1,47,211 nem tzü tajemtsü agütsütsü sentong lir, ta paisa shisem.

Tanü session nung Advisor Tongpang Ozukum-i Governor onük atema motion of thanks benokdang 14 buba Nagaland Assembly züngsemtemi Governor dang kanga pelaba metetdaksü.

Iba sülen Advisor H. Tovihoto Ayemi-i motion ji nungit aser NLA Speaker Sharingain Longkumer-i amendments lira asüng nikongdang 2:00 ako tashi nung Assembly Secretariat ket nung agütsütsü osang metetdaksü. Nagaland Governor indang onük ta Brihostibarnü assembly nung benoker olemteptsü.

Nagaland H&FW-i COVID-19 & Influenza H3N2 atema metetdaksür

Dimapur, March 21, 2023 (TYO): Linük nung Respiratory Tract Infections kanga prokshiba atema Nagaland nung Health & Family Welfare department-i COVID-19 (XBB 1.16) aser Influenza H3N2 atema osang metetdaksüogo.

Nagaland nung tesüsabuba Covid-19 putetbaji February 11, 2023 nü liasü saka surveillance mapa tuluba inyaker aser Rapid Response Teams jeretpera alitsü metetdaksüogo, ta Department of H&FW-i ashi.

Nisung kar Respiratory Tract Infections ajanga

timtemba ama bilemra tendangtsüla ajisüaka tensa shitak dang lir anungji public-i maoksatsüla, ta department-isa metetdaksüogo.

Respiratory Tract Infections menatepba azüoktsü atema temang merükmeju shitak masüba, hajidang aser aketdang tebang menembangba aser taktang tila nung nisung aika adenshidang COVID-19 dena Influenza A (H1N1, H3N2, etc.) amala menateper.

Anungji item tashidak menatepba azüoktsü atema tsünglanglen agüja aliba

inyakyim benschitsüla.

- # Aketdang mesüra hajidang tenang romal/tekkettsü/tissue ajanga tebang aser teni nembangtsüla.
- # Public tesemtem nung metzü memetsütsüla.
- # Nisung aika alidak Masks enoktsüla.
- # Mapang shia teka metsüksüla.
- # Shirangba yimya ajitetli Health Care Workers dangi aotsüla.
- # Tango sashiba nung timtem aliba nisungtem dang nungi pilaa alitsüla.

Tuensang nung Poshan Pakhwada 2023 tenzükogo



Poshan Pakhwada 2023 semzükba sentong nung tangokba noksa nung angur.

Dimapur, Metsüremi/March 21 (TYO): Sangsangnyu ICDS project den lungjemer district level Poshan Pakhwada 2023 semzükba sentong ka CKS Hall, Tuensang nung March 21, 2023 nü agia liasü.

Deputy Commissioner, Tuensang, Nokchasashi NCS ajanga iba sentong nung ashiba agi, taoba mapang tanurtem pok agi mato liasü saka School Education Department aser Social Welfare Department nati Anganwadi Centre tem nung

mid-day meal agütsüba ama department lungjemer tanur anema alitsü asoshi scheme balala inyaker.

Poshan Pakhwada ya anogo 14 sentong ka lir, kong Social Welfare Department ajanga District, Block aser Village level nung sentong balala ayongzükba agitsü, ta pai ashi.

Pai department balala aser yimdak-yimtsüng nung lenirtem dang district nung iba sentong takok ngua inyaktetsü asoshi amalitep akatsü ayongzükba liasü.

Deputy Commissioner-isa Poshan Pledge ktdangsiä agi aser Poshan Pakhwada 2023 semzükba liasü.

Iba sentong nung Natichumdäm-i Poshan Pakhwada indang tongmelang agi rateta ashi, DPO (ICDS), T. Longlang Luckpan-i tarur pela agizükba o jembi aser District Coordinator, PMMVY Tuensang L. Tonen Chang-i melepzüng o jembia liasü. Iba sentong nung menden Hanglenchila liasü.

Persons with Benchmark Disabilities atema committee tentetogo

Dimapur, Metsüremi/March 21 (TYO): Rights of Persons with Disabilities Act, 2016 nung mela aliba ama aser P&AR sangdong nung ashiba ama Nagaland Governor-i Persons with Benchmark Disabilities pur atema posts jangjateta asadangsü atema Committee ka shimtetogo.

Iba Committee nung züngsemtem yamai alitsü:

1. Commissioner & Secretary, P&AR Department :- Chairperson

2. Commissioner & Secretary, Social Welfare Department:- Member

3. Commissioner & Secretary, H&FW Department :- Member

4. State Commissioner for Persons with Disabilities:- Member

5. Secretary, P&AR Department :- Member Secretary

Iba Committee yagi Department balalai posts balala sangdongba nung Persons with

Benchmark Disabilities atema posts tem asadanga sorkar dangi abentsü.

Iba Committee ya küm nung anaben ajuruteptsü aser Committee nem mapang shia agütsüba cases tem asadanger yoktsü.

Parnoki Persons with Benchmark Disability atema posts jangjateta lemzüksübatem asadangsü aser update sütsütsü aser disability category nung abbreviations tasen agütsütsü.

H&FW ajanga wara balala atema tekum dangtsü metetdaksü

Dimapur, Metsüremi/March 21 (TYO): Linük nung COVID-19 (XBB 1.16) aser Influenza H3N2 cases tali akumer ta osang balala angazükba nung ajemdaker Department of Health & Family Welfare ajanga Respiratory Tract Infections tem menatepa aoba azüoktsü aser ajemdaksütsü kanga tongtipang ta nenshia metetdaksü.

Temang mürekmejua aliba, dangar anasa hajiba aser aketba, kilung nung lokti adenshiba amala ajanga COVID-19 densema Influenza A (H1N1, H3N2, etc.) densema viral respiratory pathogens tali menatepa aiba nung shilem tulu agir, ta ashi.

Item pathogens timbai temang meta aketdaksüba acute respiratory infection adokdaksür aser talisa tanur, tain, temang tuozük tali alirtem aser co-morbidities (chronic obstructive pulmonary disease, cardiovascular disease, chronic renal aser liver disease amala) alirtem aser mashisa tetsürtem nem temang nung timtem tali agüja mozü kidang anepalutsüsa akumer.

Anungji item tashidak menatepa aoba ajemdaksütsü mechi tsünglanglen shia aliba sülen anidaksüla;

Hygiene * Aketdang aser hajidang tissue/handkerchief/elbow agi teni aser tepang nembangtsüla.

* Nüburtemi amshiba tesemtem nung metzü mashi meindoktsüla.

* Nisung tali alidak Masks amshitsüla.

* Mapang shia teka shidoktsüla.

2. Tekeraba nung temang anepalu tenzüksü asoshi temang nung timtem aliba Health Care Worker nem tekeraba nung metetdaksütsüla.

3. Tango sashiba timtem agi shiranga alirtem anasai kangabo maotsüla.

Tashidak nungi kumzüksü aser azioktsü asoshi inyakttsü (Do's) aser meinyakttsü (Don't's) tem:

Inyakttsü (Do's)

1. Sapon aser tzü agi teka shidoktsüla.
2. Masks agitsüla aser lokti tulu nungi pila alitsüla.
3. Hajidang tepang aser teni nembangtsüla.
4. Tenük aser teni nung mokongshitsü merangtsüla.
5. Tzü peria ajemtsüla.
6. Temang metaba aser ayangba mapang Paracetamol achitsüla.

Meinyakttsü (Don't's)

1. Teka agi salemba mesüra temang nung kongshia salemba.
2. Yimjak nung metzü indokba.
3. Doctor dang masüngdangi antibiotics mesüra danga mozü agiba.
4. Dangar den tsüngtepa mener chiyongba.

Iba den külemi COVID-19 indang XBB 1,16 variant dak sendakba nung iba tashidak ya Genome Sequencing of a Positive Covid-19 sample ajanga puteter. Iba dak sendakba nung Nagaland nung positive case tesüsa putetba ya February 11, 2023 nü liasü, anungji genome sequencing atema samples yoktsü madoker.

Surveillance tali kumogo aser Rapid Response Teams ajanga metetdaksü.

Respiratory Tract Infections indang yimya alirba nüburtem tendangi arutsü ajungshir, ta ashi.

H3N2 aser COVID-19 densema respiratory tract infections tali kumaka tashidak tamajungba akumba osangbo mali, anungji nüburtem kumdanga aser metsüboi alitsüla, ta Department ajangasa ashi.

TENÜNGSANG AGÜTSÜR



Onok Chumokedima Longjang Senso (CLST) Telongjemi asen lenir **Shri T.N. Manen** shibai 14th Legislative Assembly kübok 23rd Impur Constituency nungi takok tuu ngutetba asoshi tenüngsang tulu agütsür, maneni asen lenir Shri Neiphu Rio-i Shri T.N Manen sempet tajung ajiteta 'ADVISOR OF LAW AND JUSTICE, LAND REVENUE' mapa ketang sütsü shimtetba asoshi kanga pelaba metetdaksür.

Iba den külemi maneni 23rd Impur A/C nung nüburtemi temulung lemteta aser meima Shri T.N Manen nem vote agütsüba asoshi ozü Chumokedima Longjang Senso Telongjemi pelaba shisemer. Yamaji nübur nungdakba angateta aser ajiteta nübur aser linük tejakleni anir aotsü teimla tulu nung sarasadem aser Shri. T.N. Manen lenisüba nung tarütsü anogo aser kümtem terenlok aser tepela tulu bener arutsü Tsüngremi asen lenir taküm moajang.

Sd/-
K. Wati Aier,
President.

Sd/-
Imrong Pongen,
Secretary.

Mokokchung DPDB senden March 24 nü amentsü

Dimapur, Metsüremi/March 21 (TYO): Deputy Development Board senden ya March 24, 2023 nü amentsü.

Commissioner, Mokokchung, Shashank Pratap Singh, IAS Iba senden ya Deputy Commissioner, Mokokchung indang Conference Hall nung agi, March ita atema anepdang 11:00 ako nungi tenzüka Mokokchung District Planning & amentsü, ta sangdong ajanga ashi.

NSCN/GPRN (Akato Chophi) pur Naga Republic Day mungogo

Dimapur, Metsüremi/March 21 (TYO): Konyak Region aser tir Akato Chophi indang 'Presidential Speech' paise kübok NSCN/GPRN (Akato zünga ashi aser teloki Chophi) indang Eastern Naga sarasadema sentong tembang. Region pur March 21, 2023 nü Kasa mapang Thahekhu Naga Republic Day munga Village nunga tenüngsang liasü, kong local bodies, council agütsüba sentong ka Dy. aser CSOs nungi tongtipang Kilonser MRA (Ministry of nisungtem dena liasü. Religious Affairs), Wankei

Iba sentong tenzüka Capt. Konyak-i anir agia liasü aser Wanglam-i Tsüngremi temoatsü pai sentong tenzüka meshia sarasadem aser iba sarasadem aser iba sülen asürtem nem akum agüja sülen Eastern Command indang teloki ola madoki sarasadema Brig, Mongnyei-i pela agizükba liasü.

Sentong nung Dy. Kilonser Maneni Kilo Kilonser (Home), Chingten-i o tatsüka Nokrang Lanu Aier-i jembi aser Tatar Temzei-i 'Presidential Speech' azüng aser melepzüng o jembi aser

Iba sentong ya Tatar Aton sentong tembanga teloki Wangnao lenisüba kübok agi sarasadema liasü.



Raj Bhavan, Kohima nungi Police House, Chumokedima tonga aruba sülen Nagaland Governor La Ganesan-i March 21, 2023 nü Dimapur nung Sitla Mata Mandir aser Hanuman Temple semdanga liasü. Iba mapang pai tekülem ki anaprong nung sarasadema liasü.



March 21, 2023 nü Kolkata nung Merchant Chamber of Commerce & Industry (MCCI) sentong ka nung MCCI Tir, Namit Bajoria-i National Commission for Women (NCW) Chairperson, Rekha Sharma (tiyong) nem tetushi agütsüdang tangokba noksa nung angur. Kasa noksa nung MCCI Ladies Forum Chairperson, Nita Bajoria-a angur.

Küm 8 tsüingda IT Dept-i sen crore 8,800 jenjang kiojen puogo

New Delhi, Metsüremi/ March 21 (Agencies): Lok Sabha senden nung sorkari, 2014-15 nungi tenzüka 2021-22 tashi nung (küm 8) income tax department-i 5,931 ben mita aoba mapang nung sen crore 8,800 dak tema jenjang kiojen puogo, ta metetdaksü.

Parliament nung tasüingdangba ka langzüdang minister of state for finance, Pankaj Chaudhary-i, 2015 küm Black Money Act benokba sülen iba ozüing kübok sen crore 13,500 indang tax demand agüja liasü; ken o 350 dak sendakba nung tax demand agütsü, ta

metetdaksü. Minister-isa, ita asem mapang agütsüdang sen crore 4,164 indang foreign assets sangdonga liasü, aser iba atemaji senchi den saru ajanga sen crore 2,476 bendenlok, ta ashi.

Lok Sabha nungsa sorkari, ATM nung senpak 2000 indang notes inoktsü mesüra meinoktsü atema sorkari bank tem nem tetuyuba magütsü, ta metetdaksü.

Union finance minister, Nirmala Sitharaman-i, "Automated Teller Machines (ATMs) nung senpak 2,000

notes meinokba atema sorkari bank tem nem tetuyuba magütsü. Bank temi dang taoba mapang inyaka aruba inyakyim, tensa mapang aser nüburtem nüngdak asadanga itemji inyaker," ta metetdaksü.

RBI annual reports nung ajemdaker finance minister-i, 2019-20 küm nungi senpak 2000 denomination notes supply masür, ta metetdaksü.

2016 küm November ita nung senpak 500 aser senpak 1000 notes tejen demonetise asüba sülen Centre sorkar aser RBI-i senpak 2000 notes adoka liasü.

Centre-i Delhi budget nokdangba atema Kejriwal-i sorkar aitsü

New Delhi, March 21 (Agencies): Hombarnü Delhi Lieutenant Governor (LG), VK Saxena-i Delhi sorkar budget proposal nokdangba sülen anogo ka lir Mongolbarnü Delhi Chief Minister, Arvind Kejriwal-i Centre sorkar sashia aitsüogo.

Centre sorkar aija AAP tongti lenir Kejriwal-i, "Parnoki kü nem apudakdaksüner. Ibaji parnok mezümeküm. Temaba nungi tsüinglanglen tashi nung mazüing-mashirtem lir," ta ashi.

Delhi assembly nung jembidang Kejriwal-i, "Onoki mapa inyakner. Onoki meraraner. Raraba ajanga shinga metenzükteter.

Tashishitep mali asübo Delhi ya 10 ben agi tali renloker lila. Centre-i Delhi Budget nokdangba ya linük temzüing anema inyakba lir," ta ashi.

Kejriwal-i, Ato kilonseri Delhi nung takok ngunera pei mezüingbuba nung yimti nung aliba nüburtem melungjang akoktsüla, ta ashi.

Paisa, "Na (Modi) adianu tambusang aser ni adianu tanubosang. Nai ni nungitra ni-a na nungittsü. Nai adianu tanubosang temelungjang koknera nai pa meimang," ta ashi.

"Budget ya tanü benoktsü liasü saka Centre-i nokdang.

Budget nung kecha temelenshi mebenoki onoki Ministry of Home Affairs (MHA)-i asüingdangba langzüogo, aser tangbo parnoki ibaji agizükogo. Parnoki kü nem apudakdaksünüa liasü. Ibaji tanga kecha masü saka parnok mezümeküm," ta Delhi Chief Minister-isa ashi.

Mongolbarnü Delhi assembly nung Budget 2023-24 benoktsü sentong liasü saka Hombarnü Union Ministry of Home Affairs-i AAP-i aniba sorkar dang LG-i ashishiba onüktem nung ajemdaker Budget tanaben benokang ta tuyua liasü.

Chhattisgarh state nung tsüingda lendong nung nisung 8 asü

Raipur, March 21 (Agencies): Chhattisgarh tesem aika nung anojungi tzüinglu sashia aruba mapang tesüiba anogo ana tsüingda state nung nisung 8 tsüingda lendong nung süogo, ta Mongolbarnü state Revenue Minister, Jaisingh Agrawal-i Assembly nung metetdaksü.

Tzüinglu aruba den rür tsükba ajanga district aika nung alu nung aonsotsü raksatsüogo, anungji takoksa anguba asadanga sülen aluyimertem nem teyari agütsütsü, ta pai metetdaksü.

benoka liasü. BJP MLA Shivratn Sharma-i, "State tesem aika nung alu nung aonsotsü, wheat aser menjang tsünüba raksatsüogo, ajisiaka tang tashi state sorkari takoksaji masadanger," ta ashi.

Sharma pusema BJP MLAs- Ajay Chandrakar aser Dharamlal Kaushik nati, state sorkari mapatong tai benokba ajanga aluyimertem dang takoksa ngua timtemer, anungji alu nung takoksa tulu anguba atema state sorkari tangsa aluyimertem nem temenok senotsü agütsütsüla, ta takhangba agütsü.

"March 19 nü state nung tzüinglu 13.7 mm aru aser March 20 nü tzüinglu 6.2 arua liasü. Nisung tenet tsüingda lendong nung asü aser nisung ka tzüinglu dak sendakba lendong nung asü. Iba dak alia tzüinglu dak sendakba lendong balala nung kiset shiruru 36 asüba den ki 209 raksago," ta minister-i metetdaksü.

"Anojungi tzüinglu aruba den rür tsükba ajanga ali hectare 385.216 nung tsünüba aonsotsü raksatsüogo. Takoksa anguba atema anogo 15 tsüingda senotsü teyari agütsütsü asoshi ozüing lateta lir," ta paisa metetdaksü.

Opposition-i iba onük nung o lemteptsü takhangba agütsü saka ibaji magizüki Deputy Speaker Santram Netam-i, iba tebilemtsü onükji khen lir benoka o lemteptsü, ta ashi.

Iba sülen Revenue Minister, Jaisingh Agrawal-i, alu nung takoksa anguba report ji department-i nguogo aser district collectors dang Raipur, Durg, Bemetara aser Kabirdham densema district ajak nung alu nung takoksa angubaji asadangang ta tuyuogo, ta metetdaksü.

Anojungi tzüinglu sashia aruba ajanga state tesem aika nung aluyimertem takoksa anguba tebilemtsü onükji opposition BJP MLA temi

Chandel-i, revenue department-i tsüingda lendong nung asürtem kibong 8 nemji sen lakh pezüzü (4) tangsa agütsütsüla, ta takhangba agütsü.

2018 küm nungi Dalit nunger anema inyakba tatalokba 189,000 liasü

New Delhi, March 21 (Agencies): Mongolbarnü Parliament nung sorkari, 2018 küm nungi tenzüka tesüiba küm pezü tsüingda linük nung Dalit nunger anema inyakba tatalokba ken o 1,89,945 benoka liasü, ta metetdaksü.

National Crime Records Bureau (NCRB) report nung ajemdaker Union minister of state for home affairs, Ajay Kumar Mishra-i iba osang ya metetdaksü.

lir, ajisiaka Scheduled Castes & Scheduled Tribes (Prevention of Atrocities) Act ozüing junga benoktsü atema mapang shia Ministry of Home Affairs (MHA)-i states/UTs nem tetuyuba agütsür, ta metetdaksü.

All India Majlis-e-Ittehadul Muslimeen (AIMIM) party tongti, Asaduddin Owaisi-i sorkar dang, tesüiba küm ana tsüingda Delhi nung yimtenren lenirtem anema inyakba tatalokba kwi liasü, ta asüingdangba langzüdang Minister of State for home affairs, Nityanand Rai-i, Delhi police-i item ama tatakokba ken o pezü liasü ta shiogo, ta metetdaksü.

Bahujan Samaj Party (BSP) lenir, Girish Chandra-i, 2018 küm nungi tenzüka linük nung Dalit nungertem anema inyakba ken o kwi liasü, aser item ama tatalokbaji mita repringtsü atema sorkar inyakyim karbo lir asü?, ta asüingdangba langzüdang Minister of State, Mishra-i, NCRB-i item ama osang bendenba sülen parnok indang "Crime in India" report ajanga metetdaksür; 2021 küm report nung ajemdaker iba osang ya sorkari metetdaksür, ta ashi.

Paisa, police aser tensa aziokbaji state sorkartem kübok

Paisa, "Item ken o pezü dak sendakba nung nisung 16 puogo aser tatalokba ana atema ken o benokogo. Item ama tatalokba nokdangtsü atema Police ketdangertem dang peipei tesem nung kümküma alitsü tuyuba den külemi ozüing kübok aibelenertem nem temerenshi agüjang ta tuyuogo," ta metetdaksü.



March 21, 2023 nü Parliament nung budget senden aliba mapang Opposition MP temi Parliament building nung nokdaker Adani Group ken o bushisüingdangtsü atema joint parliamentary committee (JPC) nem agütsütsüla, ta akhangba noksa nung angur.



TIR YIMYIM YIMOBILEM (EDITORIAL)

DIMAPUR RASEMNÜ, METSÜREMI (MARCH) 22, 2022

Alima tzü anogo

Tanü ya alima tzü anogo lir. Iba anogo nung alima nung alir meimchirtem ajak tzü tajung peria ajemtsüsa inyaksü aser alitsü asoshi ajungshiteper. Atangji, alima tzü anogo ya alima nung tzü maliba agi masü, kechiyong alima ya noklang shilem nung shilem 70 bo tzü dang lir. Ajisüaka, tebilemstü kaji, ali telong, tema aser meküta aliba tzü shilem 100 nung shilem 70 bo tzü tamajung, metsü tzü, nisung ajemtsüla masü, anungji tzü tajung aser temerükbo noklang shilem nung shilem 2.5 dang lir. Tetezü alima nung aliba tzü shilem 100 nung 97.5 % bo nisung ajemtsüla masü. Aji oda, nisung ajemtsü akokba tzü tajung shilem 2.5% nungjia ali tema nungbo tzü tajungji shilem 0.3% dang lir. Iba tzü tajung 0.3% anguba tesem nung alirtemji asenok, iba jagi asenoki tzü tajemtsü manguba timtem indang kanga süoki iabo mebilemer. Atangji, asenoka takong mapangbo tzü agi anünger saka tzü tajung makaba agi koda masü tüzuraba aser shirangba timtem tashi agibo asenokbo matonger. Ashiko, iba jagi asenoki alima nung tangar tzü tajemtsü tajung manguba timtem indang jembidang kangabo shishia mebilemi alitsüa akok. Ajisüaka, alima nung nütsüng yongsük asemsü nung anasübo tzü tajemtsü tajung mengui timtemba purtem lir. Tetezü alima nung nisung asem shia anabo par lima nung tzü tajemtsü tajung mangu timatemer. Item lima tia den kodang asenok medemdangdir, asenokbo kotak nung alir amai bilemstüsa tzü mopong tajung peria angudak alir. Ajisüaka, alima nung ya kechisarina nüngdak ajak ya Tsüngremi asen peri dang yuja lir, anungji kodang asenoki mashimashi mesüra mapayui mesüra memeyaki amshidir, tzü asüyonga kongadoker aser mopong asüyonga menenadoker. Iba jagi asen lima nunga tzü tajemtsü agi tanüngba-tanüngba aser takongba –takongba akümba asenoki meteter. Asen lima nung tzü tajemtsü tajung anguba ya tüzübo, ayong aser ali telonglen nungi angur. Ajisüaka, tanem tanemi asen lima nung arem samaa aoba agi ayong aser tüzübo takongba takongba akümba asenoki angur aser lenden limalena akhidangbo ali telonglen kopi meii tzü tuteta aser perepteta jema aliba to tanü asüngbo talangka tua aiyonga tzü mangur aser tzü anguyonga tzunglura mapang süir tsüngküm mapangbo melamelaa kongadoker. Ibaji asenok asoshi shisabolutsüka lir, kechiyong ibaji asen alidak aser temeket nung asenok ajemtsüba tzü tajung samaa aoba tamaitü lir. Tanü United Nations nükjidongbo 2030 tashi nungbo alima nung nisung aliba tesem ajak nung tzü tajemtsü peria angutsüla aser metsümeshidak shitak merüka yutettsüsa nisungtem libaliro jenjang tonger alitsüla. Iba nükjidongji atongtsü atema tanü linük ajak nung tzü meruseptsüsa aser mopong memenentsüsa kija kibong, lokti aser yimten ajaki pei akok shilem tajung agitsü ajungshiteper. Tzü aser mopong tajungji asenok taküm lir, anungji asenok taküm junga linüra mezüngbubaji tzü tajung peria alitsüla aser mopong temerük aontsüla. Talisa tanü putu nung Covid ama tetsübuttsü tashidak nokdangtsü merangba nunga tzü tajung ya kanga tongtibang hadir ka kümogo, kechiyong teka metsükpet metsüka alitsüla aser metsümeshidaka kanga merüka alitsü nüngdaker. Ajisüaka, temang merüksüabajibo yutsür kidang soruchioktsü asoshia tzü peria mekara, kechia agi teka metsüktsü aser metsümeshidaka kechi agi shidoktsü ? Tanü tzü tajung peria manguba limatem nung tashidak tapu balala pokteta nisung asübjaji tzü makaba agi merükmejua melitetba ajanga pokteta tashidaktem lir. Taküm 2023 küm alima tzü anogo omen ya “Ali telonglen aliba tzü” ta shimteta lir. Tetezü nisungtem taküm alitsü asoshibo ngur mengujem aliba tzuim tzü ya masü saka asenoki mangulen ali telong nung atsüngdena aliba tzü ya lir. Anungji, asenoki ali telonglen aliba tzü ya merusepdaktsüi anepalutsübjaji kanga tongtibang kümogo. Tanü asenoki ali telonglen nungi tzü atsüteta ajemer saka iba melena ali temalen nungibo tzü meludaktsür, iba jagi melamelaa kongadoker. Ajisüaka, asenoki tzunglu tzü ya yimzüka moudaktsüi ali telongleni yoktsüsa ali tulu aser tarok tur yangji yimokdaktsüra, iba jagi ali telonglen tzü atsüngtettsü aser takong mapanga meruseptsü. Atangji, tzü merusepdaktsütsü asoshi asenok nisung shiai shitokshira dang aser tzü amshiba mapatem nung akok tashi tzü kanga apayua amshitsübjaji tanü ama Alima Tzü Anogo amungdang bilemtetdaktsür aser nenshia ajungshir.

OLEMSABANG

LRD PURI TSUDIYIM TA SÜR KA PARNOK SASA TENTET ASER TIYAZÜ NUNG SEN INDOK

~Odi Jamir & S. T. Yapang Lkr

Land Resources Department RTI Reply NO.DoLR/RTI-3 (Vol-II)/486-87 Dated, Kohima the 13th Oct, 2022 nung ashiba agi tanga scheme medeni PMKSY-WDC kija nungi Mokokchung District nung sen 35.244 crore indok, iba RTI reply onoki social media nung prokshiba ngua beneficiaries-temi pei tenüng nung sen zülua alibatemji timbai memetet liasü.

Ano tetamatsüji kasa iba RTI telangzüba nung Land Resources Department puri Mokokchung district nung Tsudiyim ta sür yim ka tentet aser yangji nisungtem parnok mulungba zülouker sen aika agütsü. Tsudiyim nung tatalokba aika lir, saka ka shinübjaji Tsudiyim nung 2019-20 küm training nisung 60 nem agütsüba asoshi sen 50,000 indokba shia lir, itemji tasür tanela arua adenba alitsü, kechiyong Mokokchung District nung Tsudiyim mali. Tsudiyim nem iba 2019-20 kümsa sen timtiba 11,82,540 agütsü, ibai tasür tanela aika arua adenba agi alitsü.

Department kari training aliba, training nung adenertem nem süngu jemdaktsüba nungi shir kaket pen alitsüba nung sen kanga indoker, ibai Nagaland nung sen achitsü lenmang temelatiba/tajungtiba ka lir. LRD puria iba inyakyimji meteta alitsü imlar, iba jakiang parnok training aiben agütsüba nung khenbo Tsudiyim nungjisa 2017-18 nung nisung 82 tashi nem training agütsüba asoshi sen 87,500 indokba shisema lir. LRD-i Tsudiyim nung 2015-16 nungi 2020-21 tashi nung süngdonglidong agütsüba medeni sen 25,22,040 shi indoker liasü. 2015 jakdang mesüra 2021 sülen sen kwi indokar ashitsü makok, joko Tsudiyim ya Mokokchung district nungi LRD puri officially aitoktsüla (delete asütsüla).

2023 NAGALAND ELECTION NUNGI TANGAZÜKTSÜ ASER TEBILEMSTÜ KAR

~ Dr. Limatula Longkümer, Serampore

(Yashi adok nungi...)

10. Angazükba agi EVM machines polling station tesem tesem nung kanga slow asü aser mapang agi mepiriba agi vote magütsütet. Voters 2000/1700 tashi aliba yim nung mapang agi mepiri ta asübjaji süngmangsetter. Süra EVM machines tampered or rigged asüba agi asü? Mesüra machine tamajung? India lima nung constituency kar nungbo voters lakh aika lir aser lakh aikati vote agütsüteter. Ya kechi tai? Presiding officier/polling officers/security ya yimten yimsüsür tangatetep nung coup aser proxy ya inyakteper asü? Inyaksangshi (system) ajakji onsara majung, ochi mali ta angateter.
 11. Tashiyim agi vote bendena takok ngur Tsüngrem teyari aser taochi agi takok angu ta candidate-temi Tsüngrem tenüng asangba YouTube nung nguogo. Tsüngrem tenüng mashi mashi amshiba nungji Tsüngremi peladima? (Yerimiah 7: 9-10)
 12. Election temer züktepba/ki raksatsüba item amala ya scope ilara nung politics asayar masü na? Yimer, kiyonger aser medemer teti alitsü, election küm 5 nung khen arutsü aser tembangtsü.
- B. Fair and clean election atema kechi inyaksüla?**
- i Senso candidate shimba yimya ya endoktsüla. Iba inyakyim ya ali tashi fair and clean election asen lima nung malitsü. Yimten yimsüsürtem aser nüburtem nem jungjunga angatetdaktsütsü nungdaker.
 - ii Tan election nung candidatetem atema pei constituency nung common platform ayonga tesem kar nungbo liogo. Iba amaji taruba election nungbo constituency ajak nung ayonga agitsü junger, yongjiang candidate shiba, mangdang, kechi sempet lir itemji nüburi metettsü aser yamaji tetemsü candidate shimtetsü.
 - iii Clean and fair election atema asenok teinyaktsü jenti lir, itemji kar:
 - a) Aika jembiyonga asenok Naga nunger timba ka sensaker asünungji aikati sen matsüngdang mejenbuteter. Pa/la rongsen peria lira vote yoka machitsü, mesüra sen agi pei senti vote mayoktsü. Economic development atema project balala arogo aser lokti tenteti nüburtem atema training tajung agütsütsü lemanng sayuteptsüla.
 - b) Arogo mission mapa lepa reprangdi, home mission nung temulung agütsüdi. Artsü atena oa mission mapa aika inyakdagi, ajia kanga dang junger saka pei atepzüng lepa repangtsü mapang tongogo. Clean election ya arogo missional project ka kümer, sentong balala yanglua nübur nem tesayuba tajung agütsüdi.
 - c) Clean election ya election mapang nung dang mesüi taruba election atema tang yongi pei yimtsüng arogo telungtet nung sentong tenzüka nübur nem angatetdaktsüdi.
 - d) Pastortem aser arogo nung tenzükertem pulpit nungi maneni tasü ita Tsüngrem O tensa den apet tang election mapang ama jembitsü ajungshir.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Good Friday nü Yisu asüba aser shia aruba jilushi sayatsü



2019 kum Good Friday nü Trafalgar Square, London nung Yisu Kangki nung metaba jilushi sayadang tangokba noksa nung angur.

March 21, 2023: Good Friday nü (April 7, 2023) London nung aliba Trafalgar Square nung actor 100-i Yisu Khrista Kangki nung metaba aser Yisu tasü nungi shia aruba jilushi sayatsü.

Surrey countryside nung amenoka aliba theatre company, Wintershall-i 2010 kum nungi tenzuka Trafalgar Square nung 'The Passion of Jesus' jilushi sayar.

Good Friday jilushi anaji angati repringdaksür aser yaküm-a nisung 20,000 dak temai iba jilushi repringa liasü.

Wintershall company-i, iba production ya London nung alirtem aser yimti semdangertem atema sempet ka lir, ta metetdaksü.

Tang agi 11 benbuba James

Burke-Dunsmore-i Yisu indang shilem agitsü aser pa atema iba ya tatembangbuba asütsü.

Iba jilushi nung Yisu Khrista apuba, Pa anema ken o angadangba, Kangki nung metaba aser Easter Sunday nü tasü nungi shia aruba sayar.

Iba jilushi nung Rome sepaitem aikati shilem agir, loktii kongsang ayipshir aser Kangki asem asonger.

Takumbo iba jilushi ya screen nunga sayatsü aser jilushi anaji (jilushi shia minute 90) sayatsü. Oshi meyiptsürtemi British Sign Language agi iba jilushi ratettsütsü.

'Passion of Jesus' jilushi nungji taküm shiruru amshitsü, 'Pontius Pilate' shidakba kor ka nung sanger Trafalgar Square-

i arutsü aser jilushi nungjisa katu kata amshitsü.

Tesüiba kum 12 tashi Trafalgar Square nung iba jilushi sayar aser 2011 kum nungbo Queen-i iba jilushi nung shilem agirtem nem 'Queen's Award for Voluntary Service' agüja liasü.

1989 kum Peter Hutley leniba nung par kidang volunteer group ya tenteta liasü aser mezüngbo par ki anasa iba jilushi sayaa liasü.

'The Passion of Jesus' jilushi ya Trafalgar Square nung April 7, 2023 nü anüngdang 12:00 ako nungi nikongdang 3:15 ako tashi sayatsü aser iba jilushiji ajaki angati repringtetsü.

Iba jilushi ya Facebook nunga 'live' sayatsü.

Sudan nung tetsür kati Khrista agizükba agi kinüngbui reshikangshi

Juba (South Sudan), March 21 (Agencies): Sudan linük nung tanur pezü tetsü kati Islam yimsü toktsür Yisu Khrista agizükba agi la kinüngbui la inzü agi alena ayu aser psychiatric hospital kati anir aoba sülen electric light agi la pudaktsü, ta osang ka ajanga metetdaksü.

Omdurman nung tanur pezü tetsü, arrshi kum 27 Awatif Abdalla Kaki-i taküm January 27 nü Khristan yimsü agizüka liasü. Lar kinünger kati la dang Yisu Khrista dak amangba ajanga dang tekümtet anguba indang lemsatepa liasü.

Yisu Khrista agizükba sülen anogo ishika lir la pungmang nung Yisu Khrista la dangi aru; iba sülen lai kinüngertem den ibaji lemsatepa liasü.

Lai Khristan yimsü agizükba agi la kinüngbui inzü agi la tetsüng alena ayuba sülen la dang yimsü tasenji tokjang ta ashi, saka lai tashi mangaba agi kinüngbui la sowar, ta tangar dang shia tekolok meshidaker yariba hospital kati anir ao.

Hospital nungji la nem injection ka tutsü aser electric light agi pudaktsü. La inzü agi alenba agi la tetsüng yiru. La kinüngbui tanur pezüpronglaji par tsüraburtem kidangi anir aoba agi la jashiseta dang alir. La temelung anisüngzükdak-a

mali, kechiyong lar tsüraburtem aser kinüngertema ajak Muslim nungir dang lir aser kinüngertemia lai Khrista agizükba agi la sowar aküm ta bilemer.

Khristan kati, "Ni la taküm atema tsümbua bilemstür aser la melungjang nung tesünep angutsü aser tanela nung aintsü atema tejenokdak tajung angutsü asoshi sarasademstür," ta ashi.

Tang tashi nungbo Khristan shingai la meyarir.

Open Doors' 2023 World Watch List nung tang alima nung Khristantem alitsü linük tamajungtiba 50 rongnung Sudan ya jenjang 10buba nung lir. 2021-2022 kum World Watch List nungbo Sudan ya jenjang 13buba nung ang liasü.

U.S. State Department indang International Religious Freedom Report ajanga ashiba agi, tanga yimsü agizükba agi ozüng alema masü ta Sudan nung sangdongba sülen tensa tajungba kumogo aser Tenla kitem raksatsüba-a anenadokogo, ajisüaka tang tashi Islam yimsü amangertem loktiliba ajak amokbanger, ibayongji Khristantem bendangshidanga züngshir.

2019 kum U.S. State

Department-i Sudan linük ya Countries of Particular Concern (CPC) List nungi agiena liasü aser Special Watch List nung züngok saka 2020 kum December ita nungbo Special Watch List nungia agienogo.

1999 kum nungi 2018 tashi Sudan ya CPC List nung liasü.

Sudan nung Islamic lenir, Omar al-Bashir-i aniba yimsüsüba 2019 kum atsüngdokba sülen kum ana tashi linük nung religious freedom jenjang tajungba aküm. Ajisüaka ano maneni 2021 kum October 25 nü sepaitemi sorkar atsüngdokba sülen nungi tenzuka linük nung Khristantem kanga reshikangshia arudar.

2019 kum April ita nung Bashir-i aniba sorkar atsüngdokba sülen civilian-military sorkari Sharia ozüng (Islamic ozüngtem) karbo agienadokogo. Linük nung tamangba yimsü telok kar dang 'mamangertem' ta ajabaji ozüng alema lir, ta sangdongba ajanga reshikangshi terabo anen.

Tang Sudan linük nung nütsüng million 43 dak tema lir aser iba nungjagi nütsüng shilem 4.5 (million 2) Khristan nütsüng lir.

ANOGO ABEN TSÜNGREM DEN

Shibai Parnok Idakji Yutsü ?

T. Ken 75:1-10

Kodang nüburtemi peisasa temaba atur aser mezüngbuba asütsü meranger, tekong 7 ji azüngtsü junger: "Saka Tsüngremji o bendanger. Pai ka ludaktsür, ka tudaktsür." Iba yagi asenok asükümba arütsür. Nüburtem kechi jenjang nung lir parnok idakji alitsü shibai mela? Tsüngremi Yohan Baptistsübai ashi, "Kotak nungi nisung nem kechi agütsür iba dak alema, pai kecha angutsü makok" (Yn. 3:27). Peteri zülu, "Anungji mapang tetemsü nung nenok uludaktsütsü asoshi, nenoki nenok sasa tashi taitba teka kübok ajemalua kumang" (1Peter 5:6). Shibai tanishirtemi temaba jenjang nung ulutsür? Tsüngremi. Shibai temeaba menden nungi teküpbokbai uludaktsür? Tsüngremi. Ibai inyaktsü shiba shisa aka? Tsüngrem. Pa kechi jenjang nung lir aji Tsüngremi pa idakji nungdaker ta shingai mebilemstüla.

Asenok kong lir idakji lir, kechiaser Tsüngremi asenok idakji yutsü ta asenoki angatetdi. Tekong 7 jagi asenok asükümba dang arutsür masü- iba yagi aremzüktsü ajungshir. Yosef taküm bilemdangang, pa tsükchirtem ludaktsütsü aser pa kechi nung alitsü tim ataa ali. Mosa aser Nehemiah indang bilemdangang. Asenok taremzük koda nungdak! Ken ken Tsüngremi pa nübur taochi makaba yimsüsür kübok yutsür. Asenoki mulungba raksatsü asoshi Tejen Lai nung ama, Tsüngremi mapang tamajung ajanga odaktsür aser asenok tali pa mesüka kümdaktsür.

Tasembuba, iba yagi asenok taküm nung shisa bulu pungpadaktsür. Na tanishir menden nung lir asü? Tsüngremi na idakji yutsü. Tsüngremi na idakji yutsü nungji Pai mulungba tashi na idakji alitsü. Pai shimtetba leman nung Tsüngremi na amshitsü. Asüküm masütsü kümdangang. Kodang asenoki asükümdir aser mezümekümdir, Tsüngremi ashir, "Ibai na alutsü mapang lir." Saka asenoki asen tila kumra, Tsüngremi ulutsütsü. Pa tekai asenok ajungkettsü. "Tsüngremi asükümer nokdang, saka ajemalur nem taochi agütsür" (1 Peter 5:5).

Tanishir tajung kübok na mapa inyakdak mesüra arogo nung timtema alir asü? Tangari telemtetba tamajung agiba agi parnok idakji yutsü asü? Ne khuret ajak Tsüngrem dangi bener arung aser itemji lemsatepang. Maneni aotsü Pa dang tashi asüngdangang aser Pai obendangtsü ta bilemtettang.

Lionsgate-i Khristan film 'Ordinary Angels' October 13 nü sayatsü

March 21, 2023: 'Jesus Revolution' film yanglurtemi ajanga asenok sasa asen Khristan film tasen, 'Ordinary Angels' taküm kum nenshia metetdaksür. Tang tatembanglen sayatsü, ta sangdongogo.

"Ordinary Angels film ya taküm October 13 nü theatre nung sayatsü. Film otsü nungji kou anepalutsür (hairdresser) kati lokti ayongzuka sangremer ka yariba ajanga sangremersang'er jala ka shirang anepa taküm kumzük, ta Jesus Revolution film produce asürtemi metetdaksü.

Lionsgate-i sayaba Ordinary Angels film nung tongti shilem agir anaji Alan Ritchson (Reacher, The Hunger Games: Catching Fire) aser anaben tashi Oscar award angur, Hilary Swank (Million Dollar Baby, Logan Lucky) na lir.

Film tasenba ya Jon Gunn-i direct asü aser Produce asürtem rongnung Kevin Downes, Jon Erwin aser Andrew Erwin nunger densema lir.

Jon Gunn-i, "Sharon Stevens aser Schmitt'er kibong otsü

ajanga, asenoki tangar yariba ajanga asenok sasa asen taneptsü anguba asenok nem nenshia metetdaksür. Tang alima den lemsateptsü osang tajungtibaji ibaji asütsü," ta ashi.

Swank-i, "Iba film ajanga asenok dang, kodak tenyartemji tesem ajaklen asenok rongnung densema lir, ta asenok nem nenshia metetdaksür. Iba denji külemi tamang, teimla, tasü-aitba aser tajung bilembaji sayatenya atema totzü lir," ta ashi.

"Iba otsü ya temang shilem tenlaba nung tashi tulu keta aliba otsü ka lir. Iba otsü aser osang sangdongba nung shilem agitsüsa maongka anguba atema ni kanga pelar," ta Swank-i ashi.

Ordinary Angels film nung tongti shilem agir, Alan Ritchson-i, "Ni ya tajung bilemer ka. Nisungtem dak tajungtiba aliba nung ni amanger. Asenok longjemerbo mapa tulu inyakettsü, ta asenok dang nenshia ashitsü nungdaker. Ibayongji ni Ordinary Angels nung shilem agitsü melungtet," ta metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Peta

(adj) tera kongshi (touch slightly)

* Gari anisangi tangar gari dak **peta** atsük.

Petinu

(n) anü tila, aonung anüung nung tesangwa tilala adoka ayar (star)

* Asenoki anüung memerüki kümdaktsüba agi **petinu** kangabo mangur.

OLONG PAITEP # 6463

Grid for crossword puzzle #6463 with numbered squares.

TIPIEN

- 1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T _ _ _ lu - (3)
10. Takdang temalen - (9)
11. Tesa _ _ _ a - (3)
13. Ajungbena temulungjang tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

- 1. Reprangdaksü - (4)
2. _ _ _ ur - (3)
4. Kiojen yangludak - (6)
6. _ _ _ _ _ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemetdak - (6)
12. _ _ _ _ adenshi - (4)
14. Tsünüsönongtsü adokdak - (3)

OLONG PAITEP # 6462 TELANGZÜBA


TIPIEN :

- 1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüngjem, 25. Süra.

LANGTSÜNGLEN :

- 1. Khu, 2. Süjak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.

Agüja aliba noksa nung meputepi aliba 10 bushiang



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tirymyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Amit Shah-i April 1 nü Mizoram nung AR Complex lapoktsütsü



Aizawl, March 21, 2023 (Agencies): Union Home Minister Amit Shah-i April 1, 2023 nü Mizoram nung Assam Rifles complex lapoktsütsü aser Laldenga Cultural Centre indang lung azüngtsütsü.

Mongulbarnü Delhi nung Amit Shah den ajurutepdang chief minister Zoramthanga-i iba osang metetdaksü.

Shah-i Aizawl nungi kilometre 15 shi pilar aliba

Zokhawsang nung Assam Rifles headquarters complex lapoktsütsü aser Assam Rifles ground (Lammual) area, Aizawl nung Laldenga Cultural Centre lung azüngtsütsü.

"Mizoram state home commissioner & secretary H Lalengmawia-i anir sorkar ketdangsürtem aser Assam Rifles külemi March 15, 2023 nü Zokhawsang nung Assam

Rifles complex semdangogo" ta Assam Rifles ketdangsür kati ashi.

Aizawl nung Assam Rifles indang teseq ana lir ka Zodin (Lammual) aser ka Khatla nung lir. Zodin nung aliba battalion headquarters ji Zokhawsang-i belentsü.

Laldenga Cultural Centre ya Aizawl tiyongtsü nung aliba Assam Rifles ground nung yanglutsü, ta Aizawl Smart City Project ketdangsür kati ashi.

Rs. 1.93 crore mapatong ya 75x90 metres nung yanglutsü, ta pasia ashi.

Laldenga ya Mizo National Front (MNF) tenzüksang lir. Parnoki 1966 aser 1986 tsüngda Mizoram linük balaka akümtsü atema rarayonga aru. 1987 küm Mizoram state akümba sülen pa mezüngbuba chief minister liasü.

Kaketshirtemi sorkar signboards nung Bodo oshi amshitsü akhanger

Guwahati, March 21, 2023 (Agencies): All Bodo Students' Union (ABSU)-i English mesüra Assamese oshitem agi government signboards zülua aliba Bodo oshi agi melentsü takhangba agütsüogo.

ABSU-i signboards nung ink tanak agi nübangtsü aser Bodo Territorial Council (BTR) nung tamasa Bodo aser iba sülen Assamese aser English nung temulung agütsütsüla ta ashir.

ABSU-isa shishilembaba dokan ajaki Bodo oshi nung signboards ayutsü takhangba agütsüogo.

Kokraghar, Bijni, Kajalgaon aser Udalguri jilatem nung English agi zülua aliba hoardings ajak hopta ka tsüngda Bodo, Assamese aser English oshitem agi zülutsü mapang züngzüktsüogo.

Bodoland Urban Development department-i

English oshi agi signboards enokba sülen iba ola tenzü.

"Urban department-i English oshi agi signboards zülur ayuba nguogo" ta Bodo Students' Union president Dipen Boro-i ashi.

"2013 küm Indian constitution ajanga Bodo ya recognised languages nung densemogo aser Bodo Accord ajanga Bodo ya state sorkar indang associate official language kümogo" ta Boro-isa metetdaksü.

Waris Punjab De züngsem 2 Dibrugarh jail-i anir aruogo

Dibrugarh, March 21, 2023 (Agencies): Khalistani lenmir Amritpal Singh den yariteper nisung ana ano Assam kübok Dibrugarh-i anir aruogo.

Tena ya Kulwant Singh Dhaliwal aser Gurinder Pal Singh na ta jangjaogo aser tena ya Hombarnü Punjab Police-i apu.

Tena Dibrugarh nung aliba Central Jail-i anir aru aser cell no 13 nung puoka lir.

Hombarnü Amritpal Singh tebu tanubo Harjeet Singh apu aser pa-a Mongulbarneq Dibrugarh-i anir aruogo.

Punjab Police-i 'Waris Punjab De' telok anema mapa tulu ka tenzükogo aser tang

tashi nung nisung 100 tema puogo. Parnok rongnung nisung 7 tashi Central Jail, Dibrugarh nung anir arua puoka lir.

March 19, 2023 nü 'Waris Punjab De' züngsem pezü Dibrugarh-i anir aru aser parnok National Security Act (NSA) kübok tai tonglokja lir.

Itanagar nung G20 Summit atema renemer

Itanagar, March 21, 2023 (Agencies): Arunachal Pradesh yimtiba Itanagar nung March 25 aser 26 anogotem G20 Summit alitsü atema renemer.

Iba summit nung United

States, China aser United Kingdom dena linük 19 nungi teshimtet nübotem adentsü.

Itanagar Municipal Corporation (IMC)-i hygiene & cleanliness atema yimti merüktetba

mapa inyaker aser Power Department-i street lights anepalur.

Itanagar nung roof lights 100 tema enokogo aser IMC-isa highway tezülen narotem atemer.



Manipur kübok Ukhrul district nung aliba mini secretariat campus telung nung improvised explosive device (IED) ka apokba sülen agiba noksa angur. Mongulbar nikongdang 4:35 ako meta mini secretariat indang northern block nung IED apok ta police-i metetdaksü. Iba lendong nung nisung yiruba mesüra kiojen raksaba osang kecha mali ta Ukhrul police sub-inspector Marchang W-i ashi.

Ni aibelena tepset ama kümdaktsütsü merang: Imran Khan

Islamabad, Metsüremi/March 21 (Agencies): Taoba Pakistan ato kilonser Imran Khan-i chief justice Umar Atta Bandial dang pa anema ken o benoka aliba angadanga mapang pa video link ka ajanga okadak inyakyim nung shilem agidaktsütsü temelaba ka meshiogo aser ashiba agi pa okadak tsüngtong arua shilem agira pa tepsettsü akok.

Bandial dangi züluba shiti ka nung Pakistan Tehreek-e-Insaf tekolakba yagisa pa anema ken o benoker alibatem ka küma lokteptsütsü mepeshia asüngdangogo.

Kiralongraba, nisung tepsetba, blasphemy, nisung tepsettsü merangba aser linük ashiochtsüba amala ken o tem densema taoba PM Imran Khan anema ken o 100 jungnüa

benoka lir. Hombarnü linük den jembiba mapang Khan-i, Toshakhana gifts ken o dak sendakba nung Hombarnü obendang agütsüba nung shilem agitsü atema pa Islamabad court complex-i aoba mapang pa tepsettsü sentong yanglur liasü, ta ashi.

Paisa, intelligence agencies nungi züngsemtem ama mejangjaba nisung 20 shia pa tepsettsü atema iba complex nung liasü, ta ashi.

Khan-isa, court complex sünga police tem adenshir aliba video ka lemsatep aser ashiba agi, rarateper ama jilushia pa tepsettsü atema sentong yanglur liasü.

"Ni Judicial Complex kishi-i ayaoka aiba mapang iba tensa ajurua liasü. Iba tashi den mejangjaba nisungtem ya ni tepuokdaki yoktsü atema masü

saka raratepba ka jilushia ni aibelena tepset ama sayutsü atema iba tesem nung adenshir liasü. Ajisüaka teküzmüker Allah sentong balaka liasü," ta pai tweet asü.

Pakistan Tehreek-i-Insaf-i ashiba agi, item nisungtem yagi parnoki amer aliba lisü agi Khan aletseta südaktsütsü sentong yanglur liasü.

PTI tekolakbai item mejangjaba nisungtem kodaser high security zone (judicial complex) kati ait, iba indang bushisüngdangtsü atema chief justice dang mepeshia asüngdangogo. "Parnok ni tepsettsü atema iba tesemi yoker liasü," ta pai ashi.

"Ni yamai yimjak nung toktsüra ni tepsettsü atema mapang talangkabo magitsü," ta Khan-isa ashi.

Xi Jinping-i Russia Tir Putin dang China semdangtsü ashi

Moscow, Metsüremi/March 21 (Agencies): China Tir Xi Jinping-i Russia Tir Vladimir Putin dang taküm China semdangtsü shiogo ta ashi aser lenir ana ya Mongulbarnü Moscow nung senden tanaben amener.

"Yashi ni Tir Putin dang taküm pa azüngba mapang China semdangtsü shiogo," ta Xi Jinping-i Russia Ato Kilonser Mikhail Mishustin den senden ka amendang ashi.

Ato Kilonser Mishustin den senden amendang Beijing aser Moscow ya kidanger linük tajung ana lir aser tongtipang maparen nung külem sür nokdaker aser China-i Russia den tesendaktep atema temolung agütsütsü, ta Xi-i ashi. China ato kilonser tasenba Li

Qiang-ia China-i Russia den tesendaktep atema temolung agütsütsü aser külemi mera balala agiba nung tashi itshtitsü, ta shia liasü.

Xi Jinping aser Vladimir Putin na senden amentsü ghonda ishika lia Mongulbarnü Russian energy major Gazprom-i ashiba agi, Power of Siberia pipeline ajanga China nem gas anogoshi agütsüba volume Mongulbarnü timba liasü.

Hombarnü Putin aser Xi na Ukraine nung rara indanga jembiba aser Putin-i Xi dang Ukraine nung rara tatem kati arutsü atema China-i benokba onük jembitsü Russia renema lir, ta ashi.

Lenir ana tsüngta ghonda pezü sür tesadang senden amen aser iba mapang China-i

Ukraine rara atema benokba 12-point position paper indang jembiba liasü, kong jembishinü akatsü aser linük ajunga litsülika temeden akumtsübotsü indang densema lir.

Kasa mapang US Secretary of State Antony Blinken-i Xi Jinping dang Ukraine Tir Volodymyr Zelensky aser Ukraine lenirtem dena jembitsü ashi.

"United Nations Charter indang Point One nung ajemdaker China-i rara tatem kati arudaktsütsü asoshi inyaker süra, parnoki Volodymyr Zelenskyy aser Ukraine den iba tamendakba nung ajemdaker inyaktüsü," ta Blinken-i ashi.

Kyiv-ia Xi aser Zelenskyy tsüngta ajurutepa jembishinütsü asüngdang aser "Beijing-i Moscow nung par sentüsü Ukraine anema raraba tatem kati arudaktsüba nung amshitsü onoki imlar," ta Ukrainian foreign ministry odongtar Oleg Nikolenko-i ashi.

South Africa nung sorkar anema longkak mait tsüngda nisung 87 apu

Pretoria, Metsüremi/March 21 (Agencies): Left-wing Economic Freedom Fighters (EFF) party-i ayongzüka linük ajunga ghonda 12 mokdanga ayutsü atema sentong yanglur aliba magi tsüngda South Africa security forces-i linük kübok tesem balala nungi nisung 87 puogo.

EFF ya linük nung party tulutem rongnung tasembuba lir aser parnoki linük nung power agi timtem agütsüba aser tir Cyril Ramaphosa mapa nungi anentsü khanga linük ajunga mokdanga ayutsü ayongzüker liasü.

"Shingaia revolution ka menokdangtetsü," ta EFF lenir Julius Malema-i Hokolbarnü parnok pusemertem dang ashi.

Ports, parliament, border crossings aser Johannesburg Stock Exchange tem ya longkak aitba tesemtem asütsü, ta Malema-i ashi.

Linük yimsüsü aliba African National Congress (ANC)-i 1994 küm temesüng nisungtemi yimsüsü aliba tembangdaktsüba sülen linük renloka aoba nung maongka shitak mangur ta bilemba working-class Black South

African nungertem aser sensaksertem aikati EFF pusema arudar.

Ketdangsurtemi ashiba agi, longkak aitba mapang mepetmesü tulu adoktsü akok aser iba ya azioktsü atema police aika yoktsü.

National Joint Operational and Intelligence Structure (NatJOINTS)-i sangdong ka ajanga ashiba agi, nisung 87 apuba rongnung capital Pretoria aser Johannesburg yimti amenoka aliba Gauteng province nungi nisung 41, North West province nungi 29 aser Free state nungi nisung 15 densema lir. Mpumalanga aser Eastern Cape nunga nisung kar puogo.

Parliament-i Deobarnü ashiba agi, police tem den longjemmer mepetmesü adoktsü aliba nokdangtsü aser ozüng alema inyaksangshirtem azioktsü atema South African military-i April 17 tashi ita ka atema military 3,474 yoktsü.

"Law enforcement ketdangsurtem kanga kümküma lir aser ozüng alema inyaksangshirtem nokdangtsü atema maneni inyaktüsü," ta NatJOINTS-i ashi.

Japan PM Kishida Ukraine Tir Zelenskyy ajurui aor

Tokyo, Metsüremi/March 21 (Agencies): May ita Hiroshima nung Kishida-i G7 lenirtem jaoka senden amentsü, saka Ukraine nung rara tenzüker iba telok nungi iba linük mesemdangba lenirji pa dang lir.

Japan Ato Kilonser Fumio Kishida ya Ukraine Tir Volodymyr Zelenskyy den senden amentsü asoshi Ukraine-i aoba mapang lir, shiba Mongulbarnü Kyiv bushia apusogo.

Japan-i taküm G7 senden Hiroshima nung ayongzüksü.

Osang ajanga ashiba agi, Japan ato kilonser ya Poland yimtiba Warsaw nungi train ka nung mener ao, koba Ukraine yimtiba Kyiv lenir aor.

Pai India semdanga Ato Kilonser Narendra Modi ajurua India-Japan tesendaktep dak sendakba aser Indo-Pacific nükla indang jembir anogo ka lir pai Kyiv semdang alitsü.

**OFFICE OF THE
MERANGKONG SENSO MUNG DANG**
P.O. Tuli - 798618
Dist. Mokokchung : Nagaland
TENÜNGSANG AGÜTSÜR

- Dr. Merangmenla**
D/o. Lt. S. Lanumeren aser Mrs. N. Apokla na jala-i Doctorate of Philosophy, Chemistry Thesis 2 "Picdicmic Acid based ID Copper (II) Coordination Polymer and its Polyaniline Composites towards Organic Transformations and Photocatalytic Degradation". National Institute of Technology Nagaland nungi ngutet. 
- Dr. Bendangmenla T. Imsong**
D/o. Mr. Tazungmeren aser Mrs. Nungshienla na jala-i Sectarianism in Matthew: A Socio Historical approach to the construction of identity in the Gospel of Matthew nung Doctorate of Theology in the department of New Testament, United Theological College, Bangalore under the Senate of Serampore University, India nungi ngutet. 
- Shri. Imlimatsung**
S/o. Lt. Imtiakang aser Olemtula na jabaso-i District Commandant menden ngutet. Pa indang designation aser department ji yamai alitsü: District Commandant, Home Guards, Civil Defence & State Disaster Response Force, Kohima. 

Nenok Wadang balala nung takok tulu ngutetta Sensosanger nem konang nungsang bener arutsü nung nenok ajak dang Merangkong Senso Mungdang-i kanga pelar aser tenüngsang agatsür.
Tsüngremi nenok takum tarutsü wadang takok aser temoatsü nung maneni len aniangma.

| | |
|--|--|
| IMLITIBA IMSONG President, Merangkong Senso Mungdang | TAKOMAYANG Secretary Merangkong Senso Mungdang |
|--|--|

**Office of the
Nationalist Democratic Progressive Party (NDPP)**
26 Aonglenden Assembly Constituency Mokokchung Region
PELABA METETDAKTSÜR

Wb. Sharingain Longkumer, mezüngbuba 2019 küm 13th Nagaland Legislative Assembly Bye-election nung NDPP ticket nungi takok ngua Deputy Speaker nungi Speaker menden ajangzükteta Sorkar kümsük tembangba tashi inyaka aruogo. 14th Nagaland Legislative Assembly General Election nunga kasa party ticket nungi takok tulu ngua Speaker menden tetokteper mali shimtetba asoshi NDPP & BJP (Alliance Party) mulngtok tesendaktep den Chief minister Wb. Neiphiu Rio aser NDPP President Chingwang Konyak nungertem dang kangasa pelaba lemsateper. Tanü tashi nung party ka nungi nisung kati term ana tashi atonga Speaker inyakba ya NLA nung otsü tasen ka asütsü südi. 26 Aonglenden nüburi tanaben shimteter külen Nagaland sorkari mulung lemteta tanaben meraket Speaker asütsü shimtetbaji Aonglenden sangeri kangasa pelasete agizüker.
Tsüngremi nübur len tajungtiba nung anitsü asoshi asen lenir aser par kibong arishi shisatsü den temoatsü agüjangma.

| | |
|---|--|
| Sd/- Nungsangmeren Lkr President | Sd/- M. Sutsüngkaba Jamir Gen. Secretary (Admn) |
|---|--|

Mkgnung tetsürtem atema State Level Judo Tournament ayongzük



Mokokchung nung State Level Judo Tournament takok ngua tembanger külen, tetushi tesemdanger den shilem agirtem, takok angurtem, asayamung ketdangsürtem aser tayongertem külemi tangokba noksa nung angur. Mokokchung, 21st March, 2023.

Mokokchung, Metsüreme/ March 21 (TYO): Mokokchung atema otsüsüsüsü Nagaland Judo Association Mokokchung (NJAM)-i 21st March, 2023 nü yangi Multi-Sports Complex, Mokokchung nung tetsür atema State Level Judo Tournament ka takok ngua ayongzükogo.

Iba asayamung nung seret balala den asaya balala lemsar

asayaa liasü. Ibai Judo Federation of India, Sports Authority of India (SAI) aser Ministry of Youth Affairs & Sports, Govt. of India teyariteng nung ayongzükaka aka. Khelo India 10 Ka Dum Women League sentong kübok 'saisapong ajanga tetsür jenjang ajungkettsü' nükmen yur ayongba maparen ka lir.

Tanep iba sentong

Mokokchung DFO, Dr. Sentitula IFS-i meraketa tenzüksü aser senpet agütsüba sentong nung Mokokchung SBI, Chief Manager, Satemmongla tetushi tesemdanger arua lai shibangtsü. Chief Jury, Pradyot Kumar Guhathakuraya lenisüba nung iba asayamung ya achayanga agi. Takok angur nem kulikaket den medal agi senpettsü.

Kylian Mbappe France team captain kümogo

Metsüremi/March 21, 2023 (Agencies): Hugo Lloris asaya nungi anenba sülen pa melena France captain mapa abentsü Kylian Mbappe shimogo, ta team den sendaktepa aliba source kati AFP dang Hombarnü ashi.

Arishi küm 24 tain Paris Saint-Germain forward Mbappe-i Hombarnü coach Didier Deschamps den sensaksemba sülen iba mapa agizükogo, ta kasa sangdong ajanga metetdaksü.

December ita World Cup final nung tamakok anguba sülen ita ka lir January ita Tottenham goalkeeper Lloris-

i pa international asaya nungi anenba osang sangdonga liasü.

Arishi küm 36 tain Lloris ya küm ter dak tema France National team captain liasü.

Kasa mapang nung Manchester United centre-back Raphael Varane-a international asaya nungi anenba sülen Atletico Madrid attacker Antoine Griezmann vice-captain asütsü shimogo.

Mbappe, shiba France team nungi tang tashi nung 66 ben asaya lir, pai iba mapa abentsü imla liasü. 2018 küm France team-i World Cup akokba nung teyari tulu

agütsüba sülen taoba küma final asaya nung pai par team atema hat-trick ka idakja liasü, ajisüaka tia maka Argentina den final asaya parnoki makok.

Taoba Monaco attacker ya PSG nung Brazil nung asayar Marquinhos sülen vice-captain lir aser Marquinhos masayatetsüsa akümba sülen pa lenisüba nung Deobarnü Rennes makokba asaya nung PSG pur asaya-a liasü.

France team captain ama par team pur Hokolbarnü mezüngbuba Euro 2024 qualifier nung Netherlands den Stade de France nung asayatsü.

Crystal Palace coach asütsü Roy Hodgson shimogo



Metsüremi/March 21, 2023 (Agencies): Crystal Palace-i season tatem tashi coach mapa bendaktsütsü atema Roy Hodgson tanaben shimogo, ta club sangdong ka ajanga Mongolbarnü metetdaksü.

Arishi küm 75 taon coach yagi iba mapa France nung Patrick Vieira ket nungi melenzükogo, shiba team-i junga masayateti relegation zone nungi point asem agi dang tejakdang akümba sülen mapa nungi anenja liasü.

2023 küm league nung

Palace puri dang asaya ka danga mekoki lir. Parnok taküm asaya pongu draw asüba den asaya tenet tamakok nguogo. Palace puri tatemsa December 31 nü Bournemouth goal 2-0 agi koka lir aser asaya 10 anunga lia parnoki point 27 nguteta tang jenjang 12buba nung lir.

Palace pur top flight nungi metugutsü atema Hodgson tanaben anir aruogo, koba pa lenisüba nung iba London club yagi 2017 nungi 2021 tashi season pezü atonga koktetogo. "Club nung tanaben arua

adentsü atema asüngdangba ya maongka ka lir, koba kü atema kanga tongtibang lir. Onok nükjidong ajak agi tang nungi tenzükaka asaya koka Premier League nungi metugutsü asoshi tenüngdakba point bendentsüba dang lir," ta Hodgson-i ashi.

"Crystal Palace dak raratsü asoshi tanüla ka aliba ajaki meteta lir aser onok pusemertem ajaki onok den külemi raratsü ta ni meteta lir," ta paisa ashi.

Hodgson indang coaching career ya 1976 küm Sweden nung tenzük aser iba sülen pai Inter Milan, Malmo, Blackburn Rovers, Liverpool, West Bromwich Albion, Fulham, Swiss national team aser England team head coach mapa inyakogo.

Palace indang coach mapa agizükba sülen pa mezüngbuba asayaji international break tembangba sülen kidang Leicester City den April 1 nü asayatsü aliba ya lir.

2005 küm sülen Nadal tang mezüngbuba top 10 nungi tuguogo

Metsüremi/March 21, 2023 (Agencies): Taoba mapang world number one aser Grand Slam 22 tashi koker aliba asayar Rafael Nadal küm 18 shi nung tang mezüngbuba ATP ranking nung top 10 nungi tuguogo.

Nadal ya 2005 küm April ita nungi top 10 nung liasü saka Hombarnü sayaba ranking nung pa jenjang 13bubai asepzüka luogo. Pa yiruba ajanga Indian Wells nung masayatetsüsa aküm.

Indian Wells nung point 600 tashi angutsü aliba maongka magiteta pa jenjang pezü asepzüka lua tang 13buba nung lir aser hopta 912 top 10 nung aliba tembangogo. Nadal ya tang number one Carlos Alcaraz küm ana majungba mapang nungi top 10 nung liasü.

January ita Australain Open nung Mackenzie McDonald makokba sülen pa yiruba ajanga tang tashi masayateti arudar.

Ajisüaka Grand Slam 22 ben koker aliba asayar ya asaya tenzükba sülen maneni top 10-i aitsü akok, ajisüaka taruba itabo iba ya mataloktsü, kechiyong pa Miami Masters nung shilem magitsü telemtetba agiogo.

Hombarnü sayaba rankings nung Djokovic-a tanabuba jenjangi asepzüka aluogo aser Medvedev trokbuba nungi pongububai tuogo, Felix Auger-Aliassime 10buba nungi troki tuogo, Hubert Hurkacz-a jenjang ana tejakdang tua tang tekububa nung lir aser Taylor Fritz pongububa nungi 10bubai

asepzüka luogo.

World number four Casper Ruud, shiba Nadal-i taoba küm Roland Garros final nung tsükdakja liasü pai ashiba agi, arishi küm 36 tain asayar yagi French Open anosa kokra pa maoksatsü.

"Iba ajanga ni maoksatsü, kechiyong pai item hopta aser itatem ya Roland Garros atema renemshitsü asoshi amshitsü," ta Ruud-i Eurosport dang ashi.

"Pa Monte Carlo mesüra Rome mesüra Madrid nung tamakok anguyonga kecha balaka masü. Pa mulung nung temang anema akümtsü aser Roland Garros atema renemer alitsü dang bilema alitsü," ta pai ashi.

Taoba küm nungtugu tennis asayar Serena Williams aser Roger Federer na asaya nungi anenadok ajisüaka Nadal aser Djokovic na maneni kanga junga asaya odar.

Djokovic, shiba May ita küm 36 ajungtsü, pai tang tashi kanga junga asayadar aser taküm Australia Open koka Nadal den kasasa Grand Slam 22 kokogo.

ATP Rankings Top 10:

- 1 Carlos Alcaraz (ESP)
- 2 Novak Djokovic (SRB)
- 3 Stefanos Tsitsipas (GRC)
- 4 Casper Ruud (NOR)
- 5 Daniil Medvedev (RUS)
- 6 Felix Auger-Aliassime (CAN)
- 7 Andrey Rublev (RUS)
- 8 Holger Rune (DNK)
- 9 Hubert Hurkacz (POL)
- 10 Taylor Fritz (USA).

Rani Rampal tenüng nung stadium ka nüngja melentsü

New Delhi, Metsüremi/ March 21 (Agencies): Rani Rampal ya India tsür hockey asayatem rongnungi la tenüng nung stadium ka jatsüba mezüngbuba asayar kümogo.

MCF Raebareli-i hockey stadium ka 'Rani's Girls Hockey Turf' ta nüngja melentsüogo.

"Ni hockey asaya atema inyaktsüba aküm agüja MCF Raebareli-i hockey stadium 'Rani's Girls Hockey Turf' ta melentsüba atema ni pelaba o agi rasa ashitsü makoker," ta Rani-i tweet asü.

Rani-isa, la indang social media handle tem nung asayatem den sensak asempa aser tanga staff tem den stadium lapokba mapang tangokba noksatem lemsatapa liasü.

Maneni la kanga pelaba lemsatapa lai, "iba ya ni atema kanga dang nemadangtsü mapang ka lir, kechiyong tetsür

hockey asayatem rongnungi kü tenüng nung mezüngbuba stadium ka nüngja melentsüogo. Ni iba tetushi ya Indian women's hockey team nem bendanga agütsür aser iba ajanga tetsür hockey asayar taruba putu ajungmesotsü imlar," ta ashi.

Taküm küm tetenzüklen South Africa nung oa asayaba asayamung atema asayar 22 shimba nung Rani tenünga züngoksema la maneni India team nungi asaya liasü.

La tatemsa Belgium nung FIH Women's Hockey Pro League 2021-22 nung asayar liasü, kong la India team nungi 250 benbuba asaya-a liasü.

Arishi küm 28 tain asayar ya Tokyo Olympics sülen yiruba ajanga junga masayateti aruogo aser ibayongji la World Cup aser Commonwealth Games 2022 team nung mezüngoksemi liasü.

BILEMDANGANG

"Meranga inyaker den teti temaotsü adener."